

摘藻堂四庫全書薈要

集部

欽定四庫全書薈要

集部

秋澗集卷七十四

五



詳校官助教臣謝登雋

欽定四庫全書薈要卷一萬六千二百三十

集部

秋澗集卷七十四

元 王惲 撰

樂府

望海潮

乙卯歲端午賦北郊
騎鞠呈節使史侯

龍王氣恒山秀色德星光動南州使君高宴北城佳

處薰風紅閃旗旒兩翼擁豺貅駭鼉鳴疊鼓杖奮驚虬
一點星飛畫柱得意過邊籌 貂蟬元自兜鍪笑閭閻

小子談笑封侯萬騎平原千艘漢水堂堂小試青油賓

從儘風流喜武同張肆書漫韓投樂事更醺醉魂還夢
菊花秋

二

為故相雲
叟公壽

炬明珂馬戟森兵衛日長鈴閣春凝舜朝儀鳳傳巖霖
雨世傳昂宿儲精天地入經綸見東山高卧一念蒼生
談笑金華故事六合海波平一杯福壽川增請丈人
靜聽賤子微誠蘇嶺雲霞西溪梅竹風煙畫出共城羽
翼漢功成儘山中名在天外鴻冥一點台星清光長射

老人明

三為子初
總管壽

桐鄉遺愛于門陰積充閭氣自葱葱霜華封菊橙金泛
醪秋香吹滿簾櫳人物漢元龍喜升堂一拜今歲相同
洗盡金貂貴氣黃卷貯深功見君雅量雍容信男兒
到此方是英雄林下夫人膝前文度摩挲湖玉雙峰福
壽儘無窮看一家樂事五縣提封彩袖歌鍾年年長醉
玳筵紅

水調歌頭

送王子初之太康

將軍報書切高卧起螭蟠悲歡離合常事知已古為難
憶昔草廬人去鬱鬱風雲英氣千載到君還歌吹展江
底長缺不須彈路漫漫天渺渺興翩翩西風鴻鵠一
舉橫絕碧雲端自笑鵲鴝孤影落日野煙原上沙晚不
勝寒後夜一相憶明月滿江干

二為仲方東園賦

野飲不稱意歸促紫游韉誰知草堂深處清賞興尤長

夢裏佳人錦瑟眼底瓦盆濁酒衣袖醉淋浪歌罷竹軒
晚風細月波涼 為東園梅與竹足清香不須更栽桃
李花底駐春光人道漆源家世王謝風流未遠培取桂
枝芳讀書貧亦好此語試平章

三 送王脩
甫東還

樊川吾所愛老我莫能儔二年鞍馬淇上來往更風流
夢裏池塘春草却被鳴禽呼覺柳暗水邊樓浩蕩故園
思汶水日悠悠 洛陽花梁苑月苦遲留半生許與詞

伯不負壯年游我亦布衣游子久欲觀光齊魯羈紲在
鷹鞬早晚西湖上同醉木蘭舟

四

和趙明叔韻

西山捲殘雨天宇翠眉脩餘霞漸成綺散樓外月如舟
漾漾銀河垂地浩浩天風拂枕吹滿一簾秋覺我清興
遠歸夢到崑幽野猿驚山鳥笑欲何求十年一官黃
散了不到封侯自有竹林佳處蒲酌窪樽貯酒一醉共
浮休夔契在廊廟畎畝不須憂

五次前
韻

紉蘭綴芳佩遠駕振靈脩王成事海無際泛若一輕舟
誰著朱衣白簡老坐癡床斜日霜鶻漫黃秋落日壯心
在不負鬼神幽笑咿嘸驚翫骸竟何求丈夫出處義
在不用計行留萬事味來嚼蠟只有濟時一念未肯死
前休驅馬出東郭聊以散吾憂

六和姚雪
齋韻

書史有真味誰遣博微官丈夫出處道在義命正須安

浩浩都門冠蓋眼，冷雞蟲得失矯首入遐觀。時對雪齋
老清議，豁襟顏。閱名書，探理窟，警銘盤，自嘆空然鼠
腹過，飲不知繁。萬古乾坤清氣散，入詩仙脾膈，揮洒有
餘歡。早晚付心訣，風雨滿堂寒。

七
壽雪齋

高齋際晴雪，萬象入遐觀。文章在公餘，事聞望到歐韓。
千古微茫，洙泗浩浩，發源伊洛。百折障狂瀾，歌詠武公
志，傲抑過銘盤。濟時心調鼎，手未容閑，重看印窠垂。

錦花底壓千官見說梅梢春信一夜蠟痕香滿光動壽
杯寬勲業鼎鐘上留待百年看

八
壽王子壽時
年八十三

汾流浥餘潤霜菊滿秋香釀成一堂和氣來薦老人觴
七十人生稀有况復年踰八十飲啖日康強骭髀欲誰
與趙壹倚門傍
頰浮丹瞳點漆鬢如霜平生陰有神
相特為表剛腸世事語來無味只有讀書一念老矣不
能忘九老更添一圖畫見高堂

九 壽時相

佩蘭近佳節高第照神州西山致有爽氣天際翠眉脩
釀作碧霄清露暗滿庭前細菊香淡一簾秋春酒未容
瀉壽席已風流 鰓鳴玉看獨步鳳池頭薦賢貢宰事
業藥籠到兼收總道生平襟量一片丹衷為國不負幙
中籌齊斡救時語持用壽君侯

十

文卿提刑自陝西按察改授河東其子東還寄聲不

肖且徵鄙作因贈樂府水調歌頭以答雅意

一峰華不注東望雨冥冥黃雲畫角回首客舍又幽并
喜接西來往耗聞道東山未老雙鬢為誰青經濟有公
論且莫嘆飄零杏花吟山色句儘稱停平生風味不
淺聊爾寫襟靈步冷東垣秋水坐對汾亭夜月兩地若
為情合作碧簫曲留待醉時聽

十一

宴張右丞
遂初園

園林足佳勝鐘鼓樂時康去天尺五韋杜此日漢金張

誰侶主人好客暫趣金華少暇罇俎共徜徉三館儘英
雋簪履玉生光 眺東臺登北榭燕南堂露涼玉簪零
亂竹靜有深香醉聽新聲金縷愛仰東山雅量清賞興
何長高詠遂初賦松栢鬱蒼蒼

水龍吟

壽都督史侯時
為東平總管

漢壇千古風流笑談自是詩書將兩淮草木一門忠孝
先聲遠暢奕世金貂雄邊韜畧三軍獨張道十年漢水
旌旗動色春都在投壺唱 一點德星廻照光浮動太

山千丈戟門春靜人安事簡提封保障漢相規隨蓋公
安靖平生心賞見壽毫不遠鳳池消息醉仙家釀

二賦蓮花
海棠

兩株雲錦翻空換根元有丹砂秘綉幃重繞銀缸高照
故家風味翠羽生紅霧紗肌玉風流誰比記沉香亭暖
貴妃半醉雲鬢亂耽春睡夢裏昆明灰冷恍留在紅
幢翠袂金盤華屋無心與並朱門桃李一醺傷春臨軒
便恐綵鸞交隊倩紫簫喚起霓裳舊曲拚花前醉

三送焦和之

當年紫禁煙花相逢恨不知音早秋風倦客一杯情話
為君傾倒回首燕山月明庭樹兩枝烏繞正情馳魏闕
空書怪事心膽墮傷殷浩禍福無端倚伏問古今幾
人明了滄浪漁父歸來驚笑靈均枯槁邂逅淇南歲寒
獨在故人襟抱恨黃塵障盡西山遠日送斜陽鳥

四賦春雪

空齋寂寞春寒坐來庭竹風聲悄天低雲暖冰花誰剪

須臾雲擾好是東君與時呈瑞春迴枯槁快黃塵壓盡
千林膏沐休更問青山老 我愛春來起早恍芸窓光
搖瓊島玉華城郭炊煙巷陌酒旗風裊高興悠然沽壚
思與文園傾倒為使君預報春城燈火比年時好

五

壽陳節齋

倚天望漢臺高

公趙人有鄧將軍望漢臺

騫騰便到煙霄上一時殊

遇風雲儼景元龍豪爽剛斷水清風流却有東山雅量
道十年京洛棠陰遺愛人如醉春風釀一點德星回

照光浮動太行千丈戟門春靜人安事簡功餘保障燕
寢香凝不妨時在騷壇吟賞為使君預泛鳳池春浪壽
金華相

六

日邊儼景同翻千年高際風雲會堂堂大節中流砥柱
狂瀾橫制黃閣歸來英姿颯爽故家房魏甚是中却有
東山雅量經綸盡金華事 總道丹心為國要春滿人
間桃李詩壇風月清時鐘鼓不妨遊戲一點台星五雲

縈繞鳳池佳氣為相君滿泛金盤仙露枕秋蟾醉

七

己未春三月同萊克濟河中流風雨大作幾覆者再
感念疇昔為賦此詞且以經事之後重有所惜云

春流兩岸桃花驚濤極目春天去孤舟纜解棹歌聲沸
漁舠掀舞雲影西來片帆吹飽滿空風雨悵淋漓元氣
江南圖畫煙霏盡汀洲樹天地此身逆旅笑歸來滿
衣塵土功名些子枕中多少艱危辛苦北去南來風波

依舊行人爭渡聽滄浪一曲漁人歌罷對夕陽暮

八

舜泉在濟南城中自壬子年水去來不常今歲秋八月余到官兩日泉流復出其深可厲回風瀟瀟翠萍盈沼邦人以為神來之兆近陪憲使展敬祠下因索鄙作謹繼承相雙溪公懷古嚴韻用紀其異

窈然碧玉池方綠波不見還凝佇翠萍痕在金支光澹湘妃無語瑤瑟聲沉畫欄愁絕幾回如許甚風煙依約

魚龍黯慘空回首珠簾暮
一夕翠華臨幸也悲涼故
宮塵土石根碧漲天瓢翻
出黑灣雷雨思舜亭高風
漪吹散滿空秋暑欲蒼梧
回叫鳳簫淒斷聽躬耕處

九

登邯鄲
業臺

春風趙國臺荒月明幾照
苕華夢從亡橫破西山留
在翠鬟煙擁劒履三千平
原池館誰家耕壟甚千年
事往野花雙塔依然是騷
人詠還憶張陳繼起信侯
王本來無種乾坤萬里中
原自古幾多麟鳳一寸囊
錐初無

銛穎也沾時用對殘缸影澹黃糧飯了聽征車動

十

至元十七年三月廿二日余按部東行梁門劉君仲
祥自高林來餞臨歧把酒長歌不休既而壺傾猶不

忍別復聯鑣

闕

畫樓十日春陰晚風吹作水花轉初冬中候應時星瑞
幾年未見沽酒尋梅就中此興撩人不淺更露堂添得
虛窓夜白清於水光如練我老久諳世味最忻然人
安米賤蝗蝻入地麥旗掉隴翠翻平甸大獵清邊為民
祈穀睿思何遠在詞臣合取元和賀例拜明光殿

十三

郭宣徽善甫開宴娛賓命樂工郭仲禮鳴笳佐酒思
甚清暢酒闌人散餘音嫋嫋宛猶在耳且有衰年清

響之感明日品甫修撰為求樂府賦越調以歌之

春風綠綺堂深樽前初識龜年面煙花紫禁幾年供奉
香飄合殿悲壯淒清九天飛下鳳吟鶯囀待近前細看
品題銀字知還是紅牙管 儘著金簧玉磬泛宮聲五
音初遍明簪四合回頭聽處少陵情惋綠酒拋春何心
傾倒汾陽金盃為斯人少漏玉堂消息瀉清商怨

十四

丙戌八月十二日宴李氏宅郡侯扎哈岱酒酣為予

親彈琵琶勸酒明日賦此曲以謝

相逢一醉金荷氣豪長恨歡娛少貂蟬貴侍內家聲伎
琵琶最好鐵撥鷗絲劃然中有繁音急調笑黃雲出塞
青衫拭淚恩怨事君休道且聽新聲硬抹更銀箏與
相繚繞空堂雪輓玉盤珠迸清雄縹緲漢殿承恩侯藩
作牧此心未老付曲中細瀉他年事業拜紅雲島

十五

去歲秋至今年春凡七月不雨有終風徒曠而已生

意殊悴然也逮二月九日雨雖以小言隨妥而釋三日方霽向來焦枯一洗而潤且又在清明節前嘗念一早所繫甚重詩云哿矣富人哀此惇獨然衆安我乃能安不然雖屋潤者其可能獨安乎此施既光誠可賀也作越調以歌之秋澗老人序

喜看春雨如膏東風吹作冰花轉海棠紅瘦梨花香澹似嫌春晚縱使寒生猶勝空際陌塵黃捲道佳人拾翠王孫憶草都不負尋芳眼 欲見太平有象除豐年更

何可羨田家作苦老臣憂國眉頭俱展最好知時清明
前後一犁非淺笑樂天空抱元和詩律夢金鸞殿一作典春
衫為問隣家新釀撥春江面

十六賦
箏

故家張樂娛賓樂中無似秦箏大華筵聽處一揮銀甲
笙竽幽積四座雄聲滿空秋雨來從天外甚翛然思變
白翎清調驚飛下金蓮塞長憶值伊手語撫哀絃醉
歌悲慨使君元有不凡風調平生豪邁綠酒瓊堂為余

翻作八鸞離海道更張正賴新聲陶寫繼中書拜

十七

送崔中丞
赴上都

綠楊一道飛花繡衣亂點如晴雪都門幾日翠鸞回軫
情馳魏闕頃不忘君時雖多暇遠猶辰說道六條儘備
諸人多樣卒難應和鸞節物勝自餘芽枿恐都輸
霜摧折人無定志事隨雲變莫捫渠舌百步穿楊空拳
搏虎豈容重發望君侯早晚去登黃閣作調元客

十八

飛卿係出將種余官燕趙時相識讀書尚義若不碌碌者然流離頃挫迄于今十年其窮極矣既為哀之且求其所以然遂有斯作以越調水龍吟歌之庶幾伯竒履霜自傷窮思返義俾採詩者聞之不無當筓逐兒之感

彫零萬木叢中秋霜不隕蒼筠節十年相見燕南趙北無限行客妻病兒殤歸來空在蒯緱彈鋏分躬耕隴畝又山鵲起誰喚與將軍獵腰下鐵絲有箭奈荒煙冷

靈虎穴見哀漂母猶勝低首看人顏色百折彌堅一窮
終泰不容終結望伯奇細瀉履霜幽怨洒西風血

酹江月

東原
寒食

天涯寒食問東風底事流連行客千樹芳菲春不管吹
盡枝頭紅雪湖水春波佳人錦瑟腸斷非離索西來一
劍不堪塵蒲霜鏑憑杖誰話春愁一罇濁酒醉了還
重酌盡日西歸歸未得怨殺山中猿鶴六印雙旌兩都
無分此去從吾樂太行佳處布衣高卧雲壑

二

平陽府倅第有來禽兩株以托根官舍有空谷幽居
之嘆逮亞尹明卿來培植顧護始知重惜今年清明
前花盛開芳姿綽約頻增容色侯置酒高會遂極歡
賞余因念草木之微豈輕重顯晦亦有數存其間邪
乃以酌江月歌之同飲者忽治中英甫劉提舉老哥
時至元甲戌春二月十有三日也

遺臺樹老獨畫欄春事猶未消歇好在來禽花盛發滿

意清明時節翠袖翻香朱顏暈酒綽約水肌潔幾年空
谷等閑飄墜香雪回首綺閣東風使君情重一顧傾
城色只恐花飛春減却來約樽前歡伯起舞山香醉歌
金縷細按紅牙拍青鸞高興恍然歸夢瑤闕

三

賦玉薰爐贈
數學劉文卿

客窓涼夕問故家何物能慰岑寂都把龍涎二萬斛滿
貯宮池瀾瀾玉立瓊洲雪翻花臆夢繞春江碧看雲去
水淋溜元氣猶濕我昨拄杖敲門主人情重預報春

消息相對掀髯談笑間一縷飛雲搖曳暖透天心冷穿
月窟好箇行窩客金盤瀉露約君同醉秋月

四

為友人壽
中丞子初

棲遲林壑甚雍容雅量氣橫零廓人道魁然真宰輔心
在朝家黃閣幾卷閑書一門清樂不羨千金橐諸郎楚
楚鳳毛輝映麟角今歲錦席雲涼菊香添麝竹樹煙
霏薄夙愛堂前秋氣好歌裏甘棠如昨十二金釵百壺
清酒細把紅螺酌年年此日醉看清獻龜鶴

五 賦鷄頭

紫荷盤若向波心濺濺鴻頭高喙滿啄明珠三百顆一
夕秋風吹落沙盞圓磋麝湯旋煮香噴佳人爵杯盤涼
夜楚江風味依約 今歲冷淡中秋空堦雨濕坐久寒
生幕草草時新聊應候兒女燈前歡噉趁暖爭拈分明
關齒翠屑紛如削老夫傍看苦吟思與韓較

韓昌黎聯句云鷄頭

刺劍石

六 福建官舍言懷

散材無用空擁腫豈是入時花樣白髮蒼顏官舍底日
把早衙來放主治官書隱憂民瘼擬愜澄清望簡華霜
在顧余闕甚得喪

闕

藕絲能繫况忝為

司長後擁前呵非不欲夢寐山林長往不憶尊鱸不懷
松桂祇為身多恙諸公垂顧免教憔悴煙瘴

浦江紅

為大丞相
史公壽

柱石中朝還不減汾陽勲考人盡道今年相府南衙春
早肘後不知金印大書中漸覺羣疑少問南枝消息幾

多春調羹了 寶竇暖香雲
裊晴雲霽西山曉見一星
朝出五雲縈繞漢日舒長
鈴閣靜雅歌聲入江淮渺
願神尖長對壽眉青應難老

二

至元十七年十一月十四日夜夢丞相忠武史公坐
甲第西閣中余侍立其傍欵急報至云有敵犯府城
西面公佩橐鞬集將領將出余握玉魚一雙跽請從
行公曰不遲不遲因朗誦一樂府意甚欣暇曰此徒

單侍講詞也既覺但記其日月風雲瀟洒六字五夜
枕上因足成之覺思來甚易錄之以驗他日之祥云
雷動雲橫驚飈驚北城西下人共駭赤丸夜語電光飛
射將領未承諸葛令橐韃已在汾陽跨笑書生思握玉
鱗符從公駕鈴索靜雲麾亞追往事何多暇道一篇
樂府翰林情話日月低回黃閣夢風雲慘淡凌煙畫儘
花邊高塚卧麒麟終瀟洒

三

德元來辭求贈言為榮且及河防利害又聞介甫提
刑捍禦衛災有功用殷卿嚴韻聊助行色兼簡德裕
彥隆二良直

冠劍梁園又去作厖眉書客休自嘆功名幾許一家風
雪春色似嫌鶯燕老秋霜歷試松筠節愛趙生游刃簿
書間昆刀鐵都會地繁華歇形勝在猶堪說更諸君
表裏玉輝冰潔水陸若論都漕計夷門忍使黃流折好
相須着力障狂瀾休傷別

四

復用前韻有懷西溪梁園之游

書劒梁園憶曾是青驄
游客宮苑廢三山依約綠雲紅
雪好在西溪王老子留連醉書花時節
記樽前金縷唱新聲忘箏鐵
襟韻合曾衰歇消客氣散情說儘暮年
心事風霜孤潔一片黃流翻晚照
回驚吳楚東南折偶
追思往事嘆餘生長年別

五

不肖目疾中承都運趙侯天章漕副相過自惟衰朽
何以得此昨晚又以樂府見示疾讀數過不覺有起
予之嘆復尋前盟略醺二公雅意

風月溪堂也曾是東州行客長記得相逢一笑羈愁都
雪又對青山談世事老懷未減元龍節恨霜蹄蹴踏短
轅間論鹽鐵官裏事何曾歇公等志吾能說儘縱橫
鞭笞玉壺冰潔爛醉春風能幾度桃花未了楊花折甚
一城相望半年過長如別

六

廿一年二月初四日午夜枕上復繼前韻書夢中所見
秣馬膏車又去作天涯羈客明見得水雲深處萬花如
雪綠暗江城多洞府紅燒燭影翻雙節被曉風吹散枕
中春簷間鐵塵世事無窮歎吾最愛滄浪說恐靈均
澤畔祇成孤潔心事比量無少惡前途何必論龜折儻
祥金陶鑄遇良工從區別

七

至元廿一年歲次甲申二月廿八日樂口離筵送殷
卿同寮西還鎮陽

一柱華峰綠翠似芙蓉金削辜負却畫舫春水一尊同
酌寒食清明都幾日征鞍遽作西歸客漫春風檣燕語
留人高城隔 春草碧楊花白粧點就行軒色道不應
霜翮能舒長策三尺青萍風義在看君冠蓋長安陌對
夕陽淡處最關情河梁別

八 壽康平
章用臣

柱石中朝人道是漢家真相試看取鳳池高步珮聲清
響世祖功臣三十六策勲合在雲臺上欲暫分霖雨霈
秦川從時望 睿思遠誰能亮空健倒驪駒唱撫一方
何似際天寅亮肘後不知金印重玉堂正要吾軍張向
五雲深處望三台光千丈

鳳凰臺上憶吹簫

為張孝先紫簫賦
係亡金宮中物

宮樹春空御幄香冷誰遺金盃人間愛一枝紫玉雙鳳
聲蟠秋月春花客思把幽情都付伊傳驚吹處籟翻天

吹鶴怨空山 風流貴家公子記夢裏瓊樓穩跨蒼鸞
恍露疑銀浦霜裂琅玕不見雲間弄玉餘音散赤壁江
寒秦臺曉碧雲零亂瑶天

二

贈喬媼
張氏

碧鳳翹寒玉霄宮晚雲恣誤讀黃庭恨凌波羅襪洛浦
塵生往事風流雲散但翠衾冷落餘馨人何在淡粧綺
袂幽樹柴荆 相逢一樽芳酒對夜色踈星歌裊雲停
記水南佳麗姚魏池亭夢繞芙蓉城闕歸馭穩緱嶺風

清桃花晚等閑辜負瑤英

秋澗集卷七十四

欽定四庫全書薈要卷一萬六千二百三十一

集部

秋澗集卷七十五

元 王惲 撰

樂府

木蘭花慢

憲陵臺畔客笑幾度送人行對一道青山兩行官柳去
住人情蒼生望初不繫問此身何用絆虛名宦味真成
畫餅隱居却伴侯鯖 十年慚愧草堂靈自分苦飄零
甚一片閑雲幾迴歸夢野釣林耕浮沉待從里社覺儻

來軒冕總堪驚寄謝竹林舊友且休筆削寒盟

二

送史誠明總管還洛陽春日飲錢任氏園亭時紅梅
爛開

愛春光淡沱歌吹暖竹西亭正花簇金鞍香生雪樹碧
酒同傾誰將翠帷雙捲擁紅粧臨水照娉婷縹緲凌波
仙子依稀羅襪塵生使君高興動青冥心事怯流鶯
對如畫江山一時豪傑湖海交情自憐人華如此且相

逢一笑惜飄零明日河陽客舍春風柳色青青

三

嘆西山歸客又愁裏過清明記幕燕巢傾朝堂人去往
事堪驚行藏固非人力頓塵纓終愧草堂靈潘岳無閑
可賦淵明何地堪耕漢家一論到書生六合望澄清
甚樓上元龍山中宰相何止虛名當年卧龍心事儘羽
毛千古見青冥憔悴中堂故吏醉來老淚縱橫

四

河內人焦其氏者作樂器僅容一握張以二絃隱彈
袖間因雙鳴起舞周旋踈曲盡音節昔人未之見
也座間承待制翰學命不肖以樂府木蘭花慢歌之
因狀其名曰鳴鳳雙棲曲

愛雙鳴棲鳳起舞袖共婆娑恨疊鼓凝笳繁絃急管悲
壯何多金泥小檀花面儘淒清翻盡雪兒歌幄殿悄聞
私語銅龍冷簌秋波 明粧高燭洗金荷心賞重經過
聽一曲留連珠簾書棟幾度斜河紅雲島仙音部說新

聲得意掩雲和看取長安日近春風搖蕩鳴珂

五

至元七年京師除夜燈下與兒子孺讀文正范公行
已且憶馬賓王來事可為之語因感而賦此以見其
志云

淡中庭暝色初遣奠夜寒淒對草草杯盤昏昏燈火客
裏京師比量舊年心事笑蹉跎書劒向來非誰著朱衣
白簡春風三拜龍墀 山妻稚子竟何為溫飽汝嘻嘻

悵故國丘山蒼煙喬木鄉月空輝葵心要須傾日道等
閑休遣鏡鸞知自信蒼顏似鐵不堪雙鬢如絲

六

奉送節使賢侯分帥譙軍兼簡仲季諸卿為一喙也
且寄聲子初知府

壯東南一柱分閫寄事非輕見雨露恩綸河山帶礪勲
府元盟依依汴堤楊柳甚一朝光彩動旗旌曉日千梁
浮竦春風百雉嚴城臨軒輦鼓正凝情忠孝舊家聲

看奕世功名麒麟高閣宛轉丹青綠波北潭花影又一年春好是清明彩袖一杯壽了望中三楚雲平

七

十三年平陽秩
滿清明日賦

老西山倦客喜今歲是歸年笑鏡裏衰容吟邊華髮薄
官留連功名事元有分且著鞭休羨祖生先望重芙蓉
天府夢餘禪榻茶煙恨無明略卧林泉平子太拘牽
儘俛首轅駒寸心能了猶勝歸田前途事如抹漆又向
誰重理伯牙絃自是一生心苦非關六印腰懸

八望郝奉

使墓

洒西風老淚又馬上望郎山對紅露秋香芙蓉城闕依
舊雄藩碧雲故人何在憶扶搖九萬看鵬搏賦就鳳凰
樓晚星沉鸚鵡洲寒一丘宿草鎖蒼煙零落復何言
似燕許才名風雲際會自古天慳皇皇使華南下愛丹
衷擬締兩朝歡恨殺奸回秋壑月明愁滿江干

九

憲臺諸公九日登高

闕

首唱樂

府諸公賡和以紀雅集之盛余時移病在告既而君
美御史以嚴韻見徵勉為續貂云

遠風臺上客說雅集玉生光縱樽俎無情登臨佳節此
興能忘龍山會君莫羨愛綠蘿影裏到山莊驄馬長安
清貴留連春草池塘淵明骭屨倚門傍多病對秋香
悵歲晚田荒幾多稂莠蕤蕤登場人間事如意少且同
來一笑共匡牀寄謝牛山公子何須揮涕殘陽

十
壽史
中丞

相門佳公子都忘却貴人驕有萬石忠勤伯魚詩禮才
氣飄飄風流謝家玉樹說妙齡英譽冠東朝桂殿親承
弓研牙冠高映金貂兩臺清議聳風標睿眷見恩饒
要寶瑟朱絃羨梅伊鼎試手更調鳳凰池還浴鳳看羽
毛奕世動雲霄鄭重歲寒貞節青松千尺難凋

十一

再和何侍御前府韻前章所謂變風終章止乎禮義
而已

六合一家統依日月到重光
道泰岱封書雲龍接踵此
意難忘西園萬花綉錯好枕中蝶化似蒙莊
斂翅深棲金粉貪芳更度銀塘
一生白眼貴人傍贏得姓名香
幾戲影棚邊隨人鼓笛賀老當場雖可笑
猶有用似也勝陳許怒爭牀靜想行藏有命且休眼熱王陽

十二

為史總帥尊
夫人之壽

靄長筵拜慶似眉壽
幾人同更綠髮垂肩方瞳炯漆五
福尊崇風流大家儀範甚能移子孝作臣忠獵獵征東

漢旆堂堂南下殊功
一江春浪醉醒中都捲入歌鐘
看和氣怡聲承顏起舞袖錦翻紅雲間發光分彩儘瀟
然林下謝家風笑擁蒲庭蘭玉年年樂事無窮

十三

賦芙蓉
杏花

聽夜來微雨甚一霎過東墻愛活色生香芙蓉標格暖
貯春光瓏鬆寶團瓊綴笑海棠能睡更無香爛熳宋郎
心眼風流時世新粧少年走馬杏花瓣勾惹興偏長
記誇酒青旗樹頭招飈喚客初嘗別來吳姬粉面比舊

年風韻轉芬芳似覺生紅闌意未容說與東皇

十四

至元十七年上巳日同西溪公飲鎮陽城南高氏勝
遊園歸賦此詞

問城南花柳最好處勝遊鄉對湖水微茫瑤翻碧潏脩
襖浮觴比量今春樂事憶去年書劔共遊梁曉日繁臺
古寺春風碧草宮牆 人生離別是尋常兩歲喜徜徉
更金縷新聲佳人錦瑟踏遍春陽多君歲寒心在似西

溪松栢鬱蒼蒼記得醉時笑語夢回枕上猶香

十五

愛一枝香雪幾暮雨洗粧殘儘空谷幽居佳人寂寞淚
粉闌干芳姿似嫌雅淡問誰將大藥駐朱顏塞上燕支
夜紫雪邊胡蝶朝寒風流韻遠更清閑醉眼入驚看
甚底事坡仙被花熱惱惆悵東闌細傾玉瓶春釀待月
中橫笛倩雲鬟吹散碧桃千樹盡隨流水人間

十六

穀雨日王君德昂約牡丹之會某以事奪北來初陽
道中偶得此詞以寄

問東城春色正穀雨牡丹期想前日芳苞近來絳艷紅
爛燈枝劉郎為花情重約柳邊娃館醉吳姬羅襪凌波
微步玉盤承露低微垂春風百匝繡羅圍看慣綵雲飛
甚著意追歡留連光景回首差池半春坐長亭畔漫一
杯藉草對斜暉歸縱荼蘼雪在不堪姚魏離披

十七

和國範郎中見贈嚴韻

卧孤松雲壑愛青貫四時心自絕澗幽蟠蒼煙高擁氣
壓千林冰霜幾年凌傲甚九天一日露恩深白壁無雙
國士朱絃三嘆遺音春風草木變蕭森又復見雄襟
想直犯龍顏片言曾霽萬里重陰相逢莫驚白首更明
時幾世似乎今只恐南陽隴底空懷梁甫長吟

十八 賦白蓮和
王西溪

愛玉華仙供偶移影下瑤池悵野渚蒼煙結根非所繁

艷爭欺風清月寒半墜道無情有恨欲誰知羅襪凌波
微步淡香高韻幽姿風煙回首夢共溪采采畫船歸
趁粉露和香秋光細釀瓊液淋漓招呼謫仙共飲記兩
舷腳踏醉吳姬一曲清吟未了翠盤狼藉珠璣

十九

武邑縣王楫善居室母俎氏出隆平富家今年八十
有九慈祥康健精彩如五六十人教授馬君向余說
如此因紹介拜求余文將為母氏百世之光予方以

善俗任責楫之孝養致樂實有關於風化者故作是辭以付俾來者庶有所勸焉

爛雲衢彩婺和曉月滿庭闈正梅粉香飄林梢紫動淑景初遲觀津盛傳王氏道孝心重見老萊衣和氣一家瑞靄慈顏九十柔儀香燒靜院趁朝暉未省杖扶持縱德厚流長遐齡能健此事應稀婆婆綠萱堂背愛一竿蒼竹六孫枝照映西山秀色年年翠點脩眉

二十

賦
醕

愛雪團嬌小開較晚儘春融似麝染沉熏檀輕粉薄費
盡春工綠陰小庭晴盡放綉簾輕度竹梢風待着一天
香韻醉吟留伴詩翁洗粧不用露華濃玉樹濕青葱
欲細挽柔條重圍錦幄不放春空春殘未應多恨道典
刑猶在酒杯中何似留芳翠枕夜深歸夢瑤宮

廿一

壽崔
子交

際河山兩界道此地正臨衝纔北渚離筵南亭奔迸終
歲倥傯風流故家從教暫淹留蓮幕簿書叢更辦錦箋

詩句筆端暈碧裁紅
今朝壽席且從容
賓客喜相同
就雪蟻浮香眉毫舒彩
莫放杯空
人生正須適意儘冰
梢蠟蒂未冲融
海曲尚存遺愛稼齋自有春風

廿二

寄王宣
慰立夫

飄泊龍灤海曾同醉鳳凰樓
記獵較河南並持英蕩萬
里長遊風流故家人物愛賦詩
鞍馬氣橫秋落日隆中
懷古薰風洛水浮舟
重逢春色入東州
小試統清流
看坐嘯江淮風連臺閣名動金甌
經綸半生心事細推

量合在百花頭此日清香畫戟不應談笑封侯

廿三

為張詹事壽

愛承

闕

更雄襟甚瀟灑清吟半生夢寐銅輦

秋為

闕

論量歸計早恐未容亭扁遂初心共道東山

絲

闕

商霖春坊桃李滿清陰氣幹鬱千尋

看旭日明堂圓杖偃植棟宇雄沉家近上林春早覺花
香浮酒動華簪滿酌一杯為壽魯連不用千金

廿四

望嶢嶢鐵峽誰設險
劈蒼岑擁萬里風煙一栓橫鎖形
勝雄沉漢王陽憶當年叱馭走駸駸
半夜郵亭索酒平
明燕市長吟 追思往事不堪尋
山色古猶今甚三下
年來青雲垂翅素髮鬢簪投閑却交應聘笑委身從事
老難任立遍西風殘照山光翠滿疎林

廿五

伏聞鑾輅近在山北以疾不能前
迂愚裏有不能者
作樂府木蘭花慢以見葵藿傾嚮之萬一云

悵居庸北口愛蒼靄擁千岑澹秋滿陪京

闕

翠

華南狩萬騎駸駸從千官望清塵齊拜聽車音日月中
天統在風雲龍虎臺深馬遷留滯卧周南戀闕破丹
心恨伏枕悠悠情關藥畧夢共秋衾豈知金鑣野鹿恐
暮年分薄是長林却為有恩未報許身愧比南金

望月婆羅門引

舜舉宋子由幕官也與予一見有忘年之歡既而告
別東遊賦此

星屯落落當年旌旆擁雍丘西風騰踏清秋回首寒雲
畫角吹斷夕陽樓且杯傾竹葉歌憂吳鉤求功名浪
枉獎盡黑貂裘重恨人生無定長負歡遊行踪南去悵
秋水秋煙總是愁江浦晚穩宿汀洲

二

小牕人靜梅枝香細月華明博山一縷雲蒸好个臞仙
風骨詩思苦憑陵有閒書遮眼歌枕松聲素無宦情
較得失一毫輕自歎高歌白雪寡和誰聽蕭然巾卷見

芝宇光浮壽頰生春酒綠何礙頻傾

三

燕城元夕有感且憶去歲汴梁行樂

去年元夕飄零書劒大梁城春風九市花燈尚憶東樓
行樂談笑故人情對一樽苦酒滿意歌聲今年可能
人與境兩玲竚寂寞黃昏陌巷戍鼓斷人行梅花歸夢
正一笑柴門稚子迎庭樹鵲何苦頻驚

四

太行晴霽孤墉高處揖清寒雲間萬髻千鬟底事春風
面目一變玉嶺圠淡夕陽平遠野鳥飛還青雲莫攀
吾高興在東山偃蹇孤松丘壑不礙春慳背陰桃李正
藉得春光亦強顏長劒缺且莫輕彈

五

柳邊層榭倚闌人共月孤高亂雲脫壞崩濤一片廣寒
宮殿桂影數秋毫儘掀髯老子露濕宮袍人生此朝
能幾度可憐宵況對清樽皓齒舞袖纖腰碧天如洗拚

一醉河傾轉斗杓
今夕樂歸路迢遙

六

昨者觀唐津舟車之盛
通湊南北誠為燕南一咽會
也第吾輩居此有抱瑟門之嘆
以婆羅門歌之

河山清眺風烟雨戒見殷都
唐津浩浩舟車一水東浮
滄海寶帶束燕吳更中州雄
跨奇貨堪居平生壯圖
笑到此反區區正似齊門抱瑟
不解吹竽視吾耿耿道
玉佩或能利走趨如不爾歸老
樵漁

七 為吹頭管

張解愁賦

愁懷索寞悠悠心事野鷗邊幾回在九堂前照眼故家
風調人物尚依然按清商一曲傾動華筵新聲巧翻
道且莫詫真元愛煞珠繩銀管滿意清圓風花無夢待
回施春光與少年杜陵老悽斷隣舫

春從天上來

承御韓氏者祖母之妹也姿淑婉善書年十一選入
宮既筭為承御事金宣宗天興二帝歷十有九年正

大末以放出宮明年壬辰鸞輅東巡又明年國亡於
蔡韓遂適舒穆魯子昭相與流寓許昌者餘十年大元
至元三年弟澍為汲令自許迎致淇上者累月一日
酒間談及宮掖故事感念疇昔如隔一世而夢釣天
也不覺泣下予亦為之歎歔也今將南歸贅兒子醜
於許既老且貧靡所休息而抱秋娘長歸金陵之感
廼為賦此庶幾摠寫哀怨洗亡國之愁顏也且使好
事者倚其聲而歌之不必覩遺臺而興嗟過故都而

動黍離之歎也歲丙寅秋九月重陽後二日翰林修撰王惲引

羅綺深宮記紫袖雙垂當日昭容錦封香重彤管春融
帝座一點雲紅正臺門事簡更捷奏清晝相同聽鈞天
待瀛池內宴長樂歌鐘回頭五雲雙闕恍天上繁華
玉殿珠櫳白髮歸來昆明灰冷十年一夢無蹤瀉杜娘
哀怨和淚把彈與孤鴻淡長空看五陵何似無樹秋風

摸魚子

賦白蓮至元廿二年乙酉九月重九後三日雨中作

澹亭亭影搖溪水芳心知為誰吐正華寶供年年事消
得一天清露私自語君不見仙家玉井無今古淡粧誰
妬儘千頃昆明紅幢翠蓋雲錦爛秋浦瓊綃襪自有
凌波故步賞心莫遣遲暮風清月冷無人見零亂碧煙
脩渚聞好去待醉浥秋香不羨風標鷺遠遊重賦擬太
一真仙共浮滄海一葉任掀舉

二

送雷彥正西還時授恩州倅

望都門滿山晴雪忽忽君又西去當時漢將征西幕氣
壓瘴江烟雨還自許儘虎穴雄探萬里班超舉燕臺再
遇甚牢落高情霜風偃薄似厭貂裘土絃歌事正爾
邯鄲故步功名從此軒翥一麾回首甘陵樹千室正歌
來暮須記取拊摩外催科未礙陽城古征鞍莫駐趨渭
北春天升堂拜慰捧檄為親舞

奪錦標

君卿宣慰來別索鄙作驢行賦樂府奪錦標為贈庶
酒酣相憶倚聲歌之六朝老樹不無動色也

六郡雄藩會稽旁帶兩浙風煙如昔碧草莫傷春浦冠
蓋東南幾多行客正新亭父老望雲霓苦思休息道朝
家雨露同春問甚江南江北 賀監歸舟逸興何似雙
旌儘慰元郎行色鏡水綠通朱閣威暢恩宣海波春寂
笑東山老去此心初非泉石約海樓翡翠同遊醉裏山
陰陳迹

喜遷鶯

初陽官舍
早春聞鶯

五更殘夢聽綠牕鶯語羅衾香擁百轉多情嬌啼無淚
枕上一聲時送真成翠娥雙筍當戶玉琴初弄欲誰共
趁風和求友喬林煙蓊春動花氣重暗度垂楊暖入
酴醾洞倦客芳踪佳人幽思愁滿彩牋金鳳自怜比來
心事兩翅果誰搏控聽指縱望高城落日黃塵飛鞚

二題聖
姑廟

仙姓郝氏博陵縣會渦里人里去涇水甚邇水多蘋

繁蘭茝仙年方笄姿態殊麗嘗同女郎輩採蘋溪中
樂而忘返一日歛蒼煙盛起白晝異色龍淵鮫室金
支光爛飄飄然有波神汴流而上衆姝驚散仙獨留
不去遙見與神顧語乘碧茵同逝俄煙開日晶遂失
所在其母哀求水濱願言一見良久覺異香襲人仙
霧鬟風馭隱約於波渚間若有以謝曰兒以靈契託
跡綃宮陰主是水塵緣已斷毋庸悲悵今而後使鄉
梓田蚕歲宜有感而過乃為吾驗時魏青龍二年也

後人相與館仙於博陵城臺制甚宏麗縣教諭李曜
告余如此今燕趙間冷竈日香火趨祀者所至風動
以孝感聖姑稱云至元庚辰夏四月按部至縣喜其
事甚異為民禱蚕祠下以仙呂命曲庶為迎送神辭
俾邦人歲時歌以祀焉

汀洲蘋滿記翠籠采采相將隣媛蒼渚烟生金支光爛
人在霧綃鮫館小鬟頓成雲散羅襪凌波不見翠鸞遠
但清溪如鏡野花留靨情睠驚變現身後神功綠滿

吳蟄蠶漢女菱歌湘妃瑤瑟春動倚雲層殿彤車載花
一色醉盡碧桃清燕故山晚嘆流年一笑人間飛電

三

己丑秋八月廿六日雨中飲賈方叔家樂藉劉氏歌
以侑觴衆賓欣然爲之賞音劉因求樂府於予遂賦
此且道坐客醉語

秋懷誰寫聽一聲金縷同傾芳酒嬌轉林鶯圓纍珠串
春在碧羅雲袖宮中磬簧齊發宇外五音何瀏坐間友

道江南風月此聲無有
回首傷離久三疊陽關不到
青青柳得意石州片帆雲影翻動海山明秀風流故家
未減自笑杜陵衰叟再相邁卷中人正好崔徽消瘦

感皇恩

贈李士觀諱儀霸州人予廿時鹿庵先生門同舍郎
也性端方嘗為刑司經歷官好學不倦與人交有終
始

回首山林遊山陰陳迹洒落襟期記疇昔論文把酒醉

盡清泉白石幾年江海上空相憶
邂逅淇南羈愁都
釋兩鬢怜君更如漆幽懷重叙不待小槽紅滴新詩隨
咳唾驪珠濕

二

贈元舜舉嘗為宋文卿屯田官以善歌聞天下祁州
人與叅政楊西庵為通家

今夕是何年故人相遇快著銀杯瀉春露高陽舊友要
聽一聲金縷行雲留不去驚如許
鳳喙微吟珠繩低

度夜半銀燭恍私語庭花零亂掩盡六朝瓊樹明朝南
浦道傷平楚

三

題沙河南堦鎮
壁留別元舜舉

濃綠漲千林征鞍東去十日初陽為君住幾回清溜飛
盡海棠紅雨人生當適意何良苦薄領閒堂風沙長
路贏得佳人怨遲暮沙頭滔盡猶惜玉鞭輕舉一聲聲
不斷歌金縷

四

暴下晉州卧病中謝故人相訪

暴下晉州城茫然心曲卧對風軒數竿竹暑光不受似
我腰圍束病機還自恃非寒燠力仕難任居閑不足
風雨憂愁更相促星星鬢影中有利名千斛省來都外
物真蠻觸

五

史公總帥子明命題其弟柔明所寫平江捕魚圖乃
以樂府感皇恩歌之古人稱文章與畫同一關紐所

媿辭意恐不稱於畫也

疊嶂際清江楓林輝映潮落波平鏡光靜六朝興廢都
付漁郎煙艇蓴鱸香正美秋風冷笳鼓歸來風雲增
勝夢裏無煩想幽景風流公子寫出五湖高興畫中還
領取江山影

六

至元十七年八月八日為通議西溪兄壽三十年前
西溪授館蘇門趙侯南衙予始相識時初夏桐陰滿

庭故有南衙清晝之句

少日竹林遊鳳麟飛走一段江山最英秀南衙傾蓋滿
院桐陰清晝鬢絲清鏡裏渾依舊雲夢心曾文章山
斗好个經綸玉堂手婆婆桂影涼入露槃仙酌一杯先
領取喬松壽

七

昔向長年老敕斷家事無令子孫闕白時人高之今
總帥公以鴻名茂績照映一世未老得請於朝亦慕

子平為人盡以內務付之諸郎其賢於人遠甚某喜聞而樂道之為賦此以歌其盛德云

節序四時間功成還退此事君侯與心會幽亭高卧眼
冷畫堂金翠越粧都付與諸郎輩虎帳籌邊錦韉歌
凱慘淡風雲夢江海大弔掛壁小隱一枝松蓋清閑人
道勝中書拜

八

送子初中丞赴燕時予在真定憲司坐間作勸子初

酒

燈火夜闌珊故人相對忘盡南牕引書睡情談疊疊時
帶少年風味門前霜月炯停吟轡湖海相望金蘭交
契白髮中年能幾會明朝趙北又是搖搖風旆一杯還
到手休辭醉

九

夏日同延陵君過簽事順之心遠堂以感君恩歌之
書葉散芸香牙籤無數案上藜羹當膏乳地偏心遠日

與聖賢晤語市聲飛不到橫披處
一炷龍涎滿甌春
露旋掃幽軒約賓任清談有味總是故家風度子雲亭
戶好龍津路

十

廣平道中寄
總管寧端甫

風雨暗公堂故人晤對邂逅燕城又三載偶因官事喜
向廣平重會照人光彩好心期在 萬里功名半生湖
海十五年間鬢顏改笑談尊俎比老幾回傾蓋秋風橫
灤上期相待

十一

癸未重午日治頭回轡得感皇恩一闋他時倚聲歌
之不能無相憶之情也示秀才鄭彥通

流水小橋橫治頭沙路一道清陰轉林塢滿襟涼潤猶
是夜來新雨幽禽欣客至如晤語坐蔭辛夷閑揮吟
塵澤畔行歌恐良苦人生適意正要時情容與却怜身
處世初無補

十二

乙酉歲八月九日晚積雨開霽碧空如洗月色入戶
似與幽人約者遂披衣步月於庭中久之覺風露凜
然恍疑去青冥無幾也因以感皇恩歌之且寓幽懷
之梗槩云

佳節近中秋秋霖晴快飛淨殘雲碧空大金波穆穆掩
盡玉繩光彩坐來風露冷青冥外世運難前儒冠何
賴四壁相如到沽賣紛紛過眼多少時情物態杳然清
夢去浮滄海

十三

與客讀辛殿
撰案府全集

幽思耿秋堂芸香風度客至忘言孰賓主一篇雅唱似
與朱絃細語恍疑南澗坐揮談麈霽月光風竹君梅
侶中有新亭淚如雨力扶王略志在中原一舉丈夫心
事了驚千古

十四

贈提刑
曹仲明

把酒愛髯卿故家風度不為臨江老能賦飽諳世事成
敗見來無數歲月如流睽離良苦春事爛珊飛花落

絮更著佳人怨遲暮羈愁頓解一笑團圓兒女慇懃君
記取周郎語

十五

登樓
即事

斜日倚高樓亂峯圍繞山色湖光翠如掃天涯倦客目
斷野煙高鳥老境駸駸憂心悄悄拂袖歸來菟裘草
草也待癡頑事湏了故園三徑已是菊荒松老諸君應
有語歸來好

十六

辛卯年秋八月與
周宰遊王氏祠堂

日日午餐餘即湏幽討拄杖長行覓周老三杯兩琖不
致玉山傾倒與君何處去乾岡好松影閑庭長吟藉
草白髮多來故人少春山何在兩樹寒梅枯槁一聲鄰
笛起催歸早

十七

史總管誠明伯還浚州老懷淒然有不能已者賦感
皇恩歌以送之

十里走徵車笑余游宦老馬為駒望英盼客懷相慰時

對凌煙生面浩歌雖慷慨南山粲
公子翩翩沉酣經
傳不是當年閑門行楊花歸路肯逐東風流轉且遮西
日去長安遠

十八

壽表弟
韓雲卿

臨事羨君材笑余拙官待詔雲龍更英盼夢回孤枕依
舊新豐旅爨明時無寸補空留戀
綠泛蓮波望高霄
漢洒洒元康濟時彥諸公延譽莫為驥淹臺院百年安
健裏千千筭

十九

壽左司吳君
草母夫人

曉色靜簾櫳
婺光千丈香
滿含真泛春
釀洛花呈瑞
照眼一枝先
放要將金屑
粉粧仙仗月
榭焚香松陰
扶

杖好箇人間
壽星樣爛斑
舞袖輝映鳳
池春浪年年
稱

慶日長無恙

三月十二日時
庭下有牡丹
兩闌內一花
獨先開

二十


壽董
野莊

健美玉堂仙
中朝元老過
眼浮華任紛
擾百年心事
愛煞野莊春
好南枝誰道
是調羹了風
月吟懷冰霜
節

操千尺青松儘難槁春宮調護好箇當年商皓日邊消
息近中書考



秋澗集卷七十五



總校官進士 臣胡 榮

校對官學正 臣卜維吉

膳錄監生 臣金 特

欽定四庫全書薈要

集部

秋澗集卷七十六

七

詳校官助教臣謝登雋



欽定四庫全書薈要卷一萬六千二百三十二

集部

秋澗集卷七十六

元 王惲 撰

玉漏遲

答南樂令周
幹臣來篇

竹林幽思杳栖遲自嘆離羣孤鳥萬里雲翔海樹去相
依遶隣笛一聲喚起憶共聽朱絲雅調還自笑當年已

愧孫登清嘯情擾回首分飛悵落落相期望高崧少

會鮮離多經世又誰曾了二子況成陳迹落月滿梁空

照庭戶曉得意眼中人少

二子謂西
溪春山

二

越山征路杳東南澹澹長空飛鳥儷影同翻明月一枝
烏遶共道有心避事甚未若從渠相調君莫笑南樓苦
要胡床舒嘯空擾畫裏江山總輸與風流眼中年少
也學癡兒官事幾時能了一曲驪歌未動還夢到三山
晴照江月曉莫為賞音稀少

前一篇懷舊有感曰鄰吹者為見寄樂府也朱絲雅
調者為鹿庵先生也孫登者為足下與諸君也二子

者為西溪春山兩忘年友也後一闕將行即事曰三
山者福城中山也幾夢者為不肖拜命前後凡夢三
至其處曰賞音不少者為彼中宋吏部陳菊圃者甚
衆故云二篇自覺語硬意凡固非樂府正體望吾子
取其直書可也

三

留別洪
上諸君

浙江江路杳蒼茫自嘆南飛鳥鳥故國回頭夢裏青山
吟遶手把一麾南去道不比八州常調君莫笑南樓苦

要胡床舒嘯 休擾歸去扁舟若比似陶朱尚猶年少
飛泳雖殊友義固應明了擬覽九江秀色誰淒斷關河
殘照霜月曉去去眼中人少

風入松

觀燈下半
開杏花

一枝穠艷照華堂暖藥貯春光寫生莫羨徐熙筆風流
在百子池傍點綴紅粧玉頰簾苔粉淡宮粧靜憐疎
影伴黃昏添麝入爐香惜花人老情緣在雲幙晚銀燭
高張細瀉一杯春露浩歌微雨東墻

三奠子

都城七夕

渺新秋節物客思天涯巖桂重碧雲賒煙華紫紫禁心
事夢長沙青銅裏人未老髮先華 鈎簾望月得巧誰
家兒女輩語空譁露翻梧葉重河映綺樓斜傾雲液歌
金縷岸烏紗

二

登河中迎煦樓樓故址即唐崔微白樓也

壯河山表裏百二喉襟形勝地古猶今風雲全晉在草
木故都深淡長空孤鳥沒總消沉 東山高卧梁甫長

吟人未老鬢毛侵平生多古意落日更登臨倚危闌窮
遠目恐傷心

三 辛卯七夕時久雨
未霽中以感寓為

湛新秋風露曖曖微霄梧葉下桂香飄鵲翻銀漢水人
渡玉闌橋歡能幾虹影斷渚宮遙 人間多巧天上無
憫今古恨苦相撩菓瓜絲曲綴兒女思空饒層軒晚香
露濕可怜宵

四

悵神光奕奕天上良宵花露濕翠釵翹風回鸞扇影愁
滿紫雲軺恨相望雖一水隔三橋朱絃寂寂心思迢
迢人未老髮先凋翻騰驚世故機巧到鮫綃涼夜永簫
聲咽篆煙飄

五

隔盈盈一水歡會今宵梧葉上雨蕭蕭星沉開帳燭雲
黯渡河橋渚宮深離思苦兩無憀金針縷細彩舫花
嬌兒女輩漫情饒巧來心愈拙絃促韻難調西樓月銀

漢影碧天遙

江城子

為張同知壽

灤江晴漾首山前
玉為淵秀相連
總把華英都付使君
賢梅竹堂深歌吹動
香似霧酒如川
列城千里聽鳴絃
頌聲喧
覺春偏
爭遣翺翔猶是貳車權
滿泛一杯添
壽酒懸斗印
看他年

二

賦拜月圖

一枝繁杏宋牆東
翠帷重捲春風留得殘粧
簾月拜玲

瓏雲作髻蟬霞作袂香霧濕玉鬟鬆
閑情都付燭華
紅瑣牕中照芳容細逐行雲零亂紫金峰天外翠鸞仙
侶在城闕晚夢芙蓉

南鄉子

近聞吾子有茂陵側室之舉順命故也且在昔賢女
雖有小星惠下之行不無鬱悵自傷之意故首章託
以自怨自責忌嫉傷善略不見也然怨不已則夫婦
道乖故釋以人子之孝嗣續為重嗚呼商陵穆子之

悲衛莊善傷已之嘆匪歌詩莫能宣其志此樂府之
所以作也庶幾言之者無罪聞之者少有慰焉

人物舊溫郎心事珠簾月半床笑裏玉臺重藉手誰量
折得楊枝惱孟光 得鯉豈思魴老境其如伯道傷但
願維罍應汝夢稱觴趁取春風慰北堂

二 癸丑三月廿一日祭
龍祠回飲張氏草堂

喬木色蒼蒼山頂難留落日光燈影碧流深幾許浮觴
來醉張家第四場 世事莫論量相對尊前兩鬢霜富

貴幾時當適意杯長問甚春星帶草堂

三

夏日同王子勉雷彥正王子初納涼西園亭

簾影靜碁枰平野風來分外清一帶好山供望眼雲屏
落日煙霏翠滿亭 世事不須驚底用相逢話醉醒常
使玉瓶沙上酒如澠杖履時來月下傾

四

春日遊李氏園亭

溪水淨灘沙紫動林梢半是花長日馬蹄閑信步誰家

曉入南園到晚霞
時事閑蜂衙一片
閑心逐去鴉
爛醉玉瓶沙上酒
生涯過眼浮雲不
足誇

五

承旨董公壽登七秩康寧好德誠可慶也取坡例以玉案香歌之

青瑣漢中郎滿袖長携玉案香
記得賦詩橫槊日臨江
氣壓風濤一葦航
蓮炬晚分光諫疏回天豈有霜
七十平頭從此數稱觴
潯水淵源慶未央

六

一雪靜林臯冷壓浮陽氣不驕
萊甲榆椒渾不動寂寥
賺得輕黃上柳條
詩思苦相撩酒盞新來頓絕交連
夜客窓寒侶水無聊誰約春風鎖綺寮

七

和幹臣樂府南鄉子南樂言懷中間更易兩韻蓋前
人用音意之例也

萬彙帝城春況是明時選用人
愛殺曲山周老子依仁

任運無心不自論 六任謾逢辰甚是榮華盡苦辛羸

得歸來兒女笑蘇秦白馬紅纓彩色新

一作潦倒客居雖有甌生塵日

有詩來

發興新

卜筮子

辛卯九月二十三日夜夢上層欄北望黑雲截空二

龍尾足連卷下垂殊分明也覺而賦此秋澗老人識

一抹截頭雲鬣鬣從龍發尾足連卷見半空霽色翻蒼

鬣 舉手欲攀鱗散我麒麟髮天外雄風祕化機吹落

蒼煙峽

青玉案

賦紫
金沙

綠陰暗盡西城樹人總道春歸去裊裊柔條高幾許絳
燈閃爍翠雲縈護元有留春處金樽未厭傾苦醕醉
墨題詩要香露蝴蝶飛來何栩栩向人有意繞欄翻舞
以約花間住

臨江仙

壽李
節使

柱石中朝黃閣相河山千古南州多君談笑覓封侯朱

輪繡皂蓋錦帶佩吳鉤
蒲府治聲歌五袴稍稍俊氣
橫秋今年壽席更風流青雲新甲第一笑醉金甌

二

八月一日同高仁甫李靖伯史潤之餞伯昌東行韓
明日至滑得陰疾後三日舟載西還夕次其門東劉
家渡而歿得年五十有九韓予出就外傳時同舍生
也哀哉

昨日舉盃親餞別六人吟嘯呵呵今朝丹旆颺城阿一

棺零落恨都付逝川波
萬事轉頭真是夢兩輪來往
如梭人生百歲合如何放開眉上鎖得酒且高歌

三

送治中
李公

天上雲衣無定態眼中時事休驚年來鍾鼎到書生一
麾仍出守五馬看專城
千古金陵佳麗地中郎素有
先聲一江春浪暮煙平此身眠食外萬事總虛名

四

為曲
山作

別墅寒梅方入夢多君來報花期野塘流水小橋西南

枝香爛熳却恨賞音稀 正有玉堂人最愛垂垂兩鬢
如絲和羨心事未應遲金樽重醉倒且莫晚風吹

蝶戀花

賦來禽
歌枝

今歲尋芳春已誤一粒丹砂不到來禽樹滿意紅芳春
也妬長條簇滿珍禽羽 化道無情應有素似惜金樽
一醉珠簾暮春自還來花自故人生最恨離筵苦

二

昔鹿庵顓軒樂育淇上一時秀造號稱多士建中元

已來例宦游四方僕僕十年間纔三至鄉里慨然有
離索之歎今歲投綬自濟南來歸而諸公頗集所欠
者唯王尚書子勉傅漕使士開耳因賦樂府以見歡
會之不恒聚散之有數也至於義安分定辭兼六客
倚聲者當自知之恐酒酣耳熱後不無倒冠落佩之
適也

淇水當年麟鳳渚回首飛翔落落風雲舉三疊陽關回
首處渭城柳色朝來雨今夕何年天所與白髮歸來

一笑同歌舞醉裏相將尋杖屨茗溪風月無今古

三

綠暗蘭皋春雨暮露挹風吹馥馥香如霧一曲清歌花
解語落紅羞滿沙頭路錦瑟華年誰與度夜月珠簾
腸斷春風句我自興來聊一顧醉魂不到凌波步

四

和曲山韻
因為贈之

經世此心誰盡了欲畫麒麟功業何由到白髮滿頭青
鏡曉花開花落人空老適意杯盤從草草甘坐清貧

方駕郊和島最愛新詩情致好篇篇直壓元郎倒

太常引

送王嘉父

去年鞍馬客南鄘奈告別苦忽忽今歲又相逢喜客舍
清樽屢同仲宣樓上杜陵幕下着處話途窮好去漢
元龍道休着青春負公

二壽麗
咨議

髯郎風度幕中蓮已師範使君賢驥足快騰騫道好箇
龍家士元滄浪高興寒花晚節秋色滿淇園一盞願

遐年要都釀君家百泉

三

壽劉
同知

太行晴色泛簾鉤對書史日優游
賓從儘風流誰道似東陵故侯
人間萬事塵埃野馬一笑付紋眉
宇壽光浮拚醉過黃花暮秋

四

周都運生朝
時添壽王村

量蟠英偉氣和愉道滄海得遺珠
忠義與心俱見漕府歸來轉輸
山呈霽色林添野水春滿野人廬
鄭重萬

金軀要羽翼當年漢儲

五

為王同知壽

雍容詩禮冠時髦都忘却貴人驕橫槩見英標道勇侶
當年嫖姚 默含萬動德尊一府歌壽聽民謠綠髮映
金貂儘千尺青松後凋

六

為萬奴總管

重於山岳藹如蘭喜一旦得同官裁鑑笑談間道不似
當年將壇 一年好處中秋節近涼露洗金盤丹桂月

中看儘耐得人間歲寒

七

奉寄參政李侯仲實自北京行省改授安西王相人
來徵詩於予因作此奉寄時屯田涇陽規畫財賦

北平移鎮入咸秦說睿眷更情親下手見經綸道好箇
中原老臣萬屯曉月一鞭農事涇水畫中春陸海儘
藏珍侶只欠侯封富民

八

春風碧水靜林丘對書史日優游來往更風流問誰侶
東陵故侯黃陂襟度曲江譽望山立看揚休春釀儘
禁筍拚醉盡蟠桃上秋

九

送段信卿赴河東憲司經歷

北來孤劔鬱蒼顏聽時事立談間秋隼正騰翻莫便倚
霜空陡寒太行秋色汾川鴈影極目送歸鞍簿領憲
司閑道好箇河東幕官

十

壽陶珉溪

南枝梅信點冰妍
覺初度得春偏
人物鱸堂仙看才思
渾如湧泉
悠悠往古紛紛俗學
鞦韆繡空鮮青鬃莫
蒼然要折裏陶家講筵

鷓鴣引

為王太夫人壽

簪纓瀟然自謝林
一家柔範到周南
以賢論母書彤管
有子能官盡孝心
香霧碧壽樽深歲時春輦
醉花陰
從今叢慶堂前月
翠竹高梧聽鳳吟

二

和周幹臣韻中統五年三月十二日夜陪徒單文與
雷彥正夜語

門外東風駐馬蹄
月明庭樹綠陰稀
眼中時事驚天運
醉裏游談侶口機
思遠走擬高飛
此心安得與時違
遺書浩蕩三千卷
未分窮愁老布衣

三韓氏
別墅

竹映方臺翠滿湖
煙霏荷露淨郊居
棣花輝映春風被
雲錦香翻碧玉壺
吟倚杖卧看書
一家風景輞川圖

酒盃儘泛床頭瓮未礙門多長者車

四

謁太一官
贈王季祥

來謁齋官又五年道人邀我坐前軒只驚前度劉郎老
不見庭松偃蓋圓人與境兩翛然呼童茶罷炷爐煙
壁間一軸煙蘿子依約風流隨眼前

五

為樂籍張
惠英賦

秋水芙蓉鏡裏仙一枝明玉濯煙鬟鶯初解語調柔舌
柳不勝嬌拂畫欄催疊鼓按弓彎樓心低月怯清寒

人生莫惜纏頭錦，能得春風幾度看。

六

野粉宮牆暮雨邊，洛京依舊鎖嬋娟。
一聲金縷關情處，滿串驪珠訝許圓。
金谷月，石樓煙，留連光景待他年。
襪塵休放凌波去，更聽新翻倒玉船。

七

浴鳳池邊養相材，朝端先肅漢儀開。
九秋灝爽臨初度，千丈恩光動憲臺。
鏘劍佩，望蓬萊，翠華南扈拂天來。

一枝好在霜前菊留待清香薦壽盃

八 為耶律總管
太夫人壽

遼海千年將相家婺星光動赤城霞
回看畫戟清香地
滿意春風玉樹花
金椅背紫雲車
謝林風度見來賒
壽波灩澦宮壺暖
滿泛秋光醉綠華

九

何處人間淑景新韶光都付牡丹春
後庭花老空瓊樹
曲水江深見麗人
金屑粉麝香裙
近前細看倒芳樽

惜教赤壁磯頭月吹散春風陌上塵

十

何處人間淑景新
劉家池館鮑家春
後庭花唱空瓊樹
曲水宮粧見麗人
金作粉麝為塵
一枝千葉擁黃雲
花工可是多情思
夢逐凌波問洛神

十一

丁亥上巳日與諸君宴林氏花園李氏以歌曲侑觴
醉中懇求樂府賦鷓鴣天以歌之李氏字蘭英樂籍

之名香者也

花草離騷試品量
猗猗香色紫蘭芳
樂棚擢秀名何麗
楚澤含秋思更長
金縷曲紫霞觴
留連光景醉銀塘
竹西歌吹歸時晚
也勝揚鞭問葛強

十二

拾翠仙洲野興長
樽前一曲杜韋娘
人憐暖日明歌扇
我愛蘭英媚國香
供楚佩笑梅粧
春風着意泛崇光
老懷不到凌波夢
要遣琵琶送一觴

十三

香靜堂萱燕處溫一家柔範被鄉鄰三牲奉養真純孝
八十康寧是福人巖菊晚嶺梅春丰容林下舊精神
發光不動雲衢爛供佛床頭景氣新

十四

贈馭說
高李英

短短羅衫淡淡粧拂開紅袖便當場掩翻歌扇珠成串
吹落談霏玉有香由漢魏到隋唐誰教若輩管興亡
百年總是逢場戲拍板門鉗未易當

十五

先相風流德業尊又看天馬五花文
飄飄青鎖凝佳思
靄靄新詩侶嶺雲
淮海秀已平分珪璋未礙琢來勤
吳人元重中州氣繡被何嘗擅鄂君

十六

潦倒衰翁不足尊更堪刺口論詩文
經涂江浙多蘭友
照眼吳山霽霧雲
傷別夕惜經分臨歧一語見微勤
萬艘未是周郎志他日經綸要使君

十七

辛卯九月二十三日靖伯仲先携酒相過客去醺然
獨坐以見酣適之意云

波蕩江湖萬里餘歸來縮首伴凡魚門從席後軒車盛
髮自霜來官味踈思往事注殘書閑鋤明月種秋蔬
傍人莫笑揚雄宅好事時過載酒壺

十八

閭井錐刀劇戰烘詠歸奚取舞雩風道開聖學千年後

春在先生一畝宮
敦誨誘見從容
絃歌不隔縵紗紅
珉溪幾點梅梢雪
歲歲吹香入壽鍾

虞美人

紅顏綠髮無長好
日對菱花老
童齒豁竟何裨
只有飢時餐飯飽
時嬉因行消散昏
和悶却覺筋骸困
那錢置酒馬兒騎
食飲難消終日繫門陲

二

謝成耀卿簽事携酒芋相過

山瓶乳酒甘如蜜，鴟芋堆盤赤。見君相贈固多情，潤我
枯腸一吸破。愁城秋光湖碧西，灣澌不到心中慊。何
時盡煮土芝香，醉飽歸來肯把故山忘。
一作醉後歸時騎馬似知章

西江月

清明拜掃，回值田家野飲。有頒白者，邀余就飲。因實
老人之意，作西江月以歌之。

社鼓驚飛梨雪村，簫吹破桑芽。清明野飲見田家，老叟
邀余下馬。歡飲一卮芳酒，繞看滿樹幽花。盃盤草草

樂年華不棄同來觀化

二

閑步州南古堤

返照斜明雙塔亂山回繞孤城年來風物侶昇平人說
三王善政 世事正宜靜待田園好去躬耕雲間歸鳥
有遺聲喚起投林高興

三

大河凝冰蔽川而下與一二寮友登白樓俯觀賦此
詞以歌之

散策暫辭臯吏倚樓來聽漁歌夕陽西下亂山多白鳥
蒼煙衝破一夜朔風吹雪白雲飛滿長河不將幽夢
付凌波意在吳郎畫舸

四

贈張子文

聯轡閑談風雅停盃高詠晁詞山城投宿晚涼時邂逅
青雲公子濯錦江邊相憶鳴條山下分携秋風搖蕩
菊花期竚候翩翩歸騎

五

繼張孝純韻

郢下空歌白雪琴中誰聽高山人生何用釘踈頑不過
兩盃白飯夢到釣臺老樹秋風閑煞漁竿沙鷗無數
點江干知我忘機去慢

六

壽王
中丞

梅蘂暗傳春信菊枝儘傲霜威風姿元與歲寒期況是
小春天氣翠實調羹未晚秋香添壽多宜高名北海
舊蟠螭未似東山雅意

七

壽李
彥祥

近歲憶游竹里今年來遇生朝平生洒落邑中豪邂逅
風神不老 賞盡山陽煙景去翻毫海雲濤太行晴色
任秋高人與黃花長好

黑漆弩

遊金山
寺并序

隣曲子嚴伯昌嘗以黑漆弩侑酒省郎仲先謂余曰
詞雖佳曲名侶未雅若就以江南煙雨目之何如予
曰昔東坡作念奴曲後人愛之易其名曰酹江月其
誰曰不然仲先因請余效顰遂追賦遊金山寺一闋

倚其聲而歌之昔漢儒家畜聲妓唐人例有音學而
今之樂府用力多而難為工縱使有成未免筆墨勸
淫為俠耳渠輩年少氣銳淵源正學不致費日力於
此也其詞曰

蒼波萬頃孤岑矗是一片水面上天竺金鰲頭蒲燕三
盃吸盡江山濃綠蛟龍慮恐下燃犀風起浪翻如屋
任夕陽歸棹縱橫待償我平生不足

二 曲山亦作言懷一
詞遂繼韻戲贈

休官彭澤居閑久縱清苦愛吾子能守幸年來所事消
磨只有苦吟甘酒平生學道在初心富貴浮雲何有
恐此身未許投閑又待看鳳麟飛走

好事近

過南雲門

南北兩雲門竹圃稻畦如畫罷亞黃雲萬頃自長渠飛
洒太行鍾秀盡三卿形勝遞高下笑我年來用捨侶
田間秧馬

二

嘗點東坡
橘藥湯作

石鼎響松風茗飲老來多怯喚起雪堂清興淪鷗斑金
屑橘中有樂勝商山香味不容說覺我胃中礪磊被
春江澄徹

三

賦庭下新
開梨花

軒鎖碧玲瓏好雨初晴三月放出暖烟遲日醉風簷香
雪一樽吟遠洗粧看玉笛莫吹裂留待夜深庭院伴
素娥清絕

四

春寒繼楊君
卿韻三首

斗柄轉春城向暖小桃開徹不似今年正月過深冬時
節故將新巧發陰機春事未容說且就驅雲風簾掃
西山晴雪

五

宮殿曲江頭漠漠輕陰開徹花柳都城三月正禁烟時
節珂鳴轂擊玉泉遊故老向人說一片春風簫鼓蕩
梨花香雪

六

華髮一衰翁，世事眼中看徹。只為年來薄宦，負東山高。
冥冥神理到無憑，此外更何說。安得百壺春酒，掃
羈愁如雪。

玉樓春

冬至夜
侍祭

陰消陽長從今數，除客歸來聞好語。月明滿地紫烟生，
暖入剌文添綉縷。冷風肅肅生庭戶，桂酒光清搖燕
俎。今冬記我致嚴時，爆竹聲中聽五鼓。

秦樓月

今歲八月自哉生明夜月色如晝及至良夕乃作風
雨所謂獨向此時偏者詩人焉得無悵然之情也取
太白詩例賦秦樓月一闋歌以問之是夜月色亦佳
但微雲點綴耳

華陽閣一年心賞中秋約中秋約九霄風露有懷都豁
桂香和雨風吹落倚欄望處秋烟薄秋烟薄一樽能
與素娥同酌

二

花時樂醪樽記醉平津閣平津閣一聲金縷滿堦紅藥
小欄此日情蕭索土膏一寸春如削春如削幾時盼
到絳燈紅爍

己丑歲春分前一日栽培衆卉罷晚坐前閣無以解
之偶得催閣芍藥辭秦樓月一闕因放聲自歌浮大
白者數行實至元二十六年三月二十一日也時夜
漏交二鼓燈下書秋澗老人題

秋澗集卷七十六